

## En memoria da Giusep Flurin Berther-Valier



Il vegls ston ed ils giuvens san murir, ina enconuschenta locuziun romontscha. Buca che nies defunct fuss staus giuvens, denton havess el bein aunc pudiu star culs ses zacons onns.

La nova dalla mort anetga dil Flurin ei stada sco in cametg ord tschiel serein. Strusch da capir, tuttavia per quels che vevan viu e tschintschau cun el aunc cuort avon. Denton aunc pli gronda frida pils ses da piarder tut surura il carezau mariu, il bien bab e tat.

Il Flurin ei naschius ils 4 da fevrer 1935 sco tschunavel affon da Gion

Antoni ed Elisabet Berther-Deplaz. Las scolas ruralas ha el frequentau en vischnaunca. Far il mistregn tier il bab gliez ha el buca vuliu, perquei eis e sedecidius da serender ella Bassa. Il matg 1951 entscheiva Flurin il mistregn da lennari a Beinwill el cantun Argau. L'aveina da sia professiun era sco da dir quasi messa en tgina ad el cun quei che siu bab veva sez ina scrinaria e fageva il «Maister». La fin d'avrel 1954 tuorna il giuven mat a Rueras cul dipiom da lennari en sac.

Cul bab ed il frar grond semetta el a per a casa per luvrar el menaschi da famiglia. Ils onns da scartezia ein plaunsiu i a fin, lavur e fadigia han ussa buca muncau. Aschia ei la pintga scrinaria dil «Toni Maister» s'avanzada tier ina interpresa che deva paun e fadigia ad in tschuat luvrers. Cul temps ei perfin il luvratori vegnius memia pigns ed ei ha giu num da tschercar spazi e plaz per ereger ina nova fatschenta. Ols «Plauns» odem il vitg Rueras han ils dus frars gronds, il Sep Fidel ed il Flurin baghegiu ina nova fatschenta. Dil temps da conjuntura aulta surtut, denton era oz han els occupau in tschuppel luvrers. Biars da quels ein era oz engrazieivels d'astgar gudignar lur paun da mintgadi tier quella interpresa. Numerus edifecis en Tujetsch ed ord la Val dattan perdetga digl engaschi dils dus frars che han omisdus finiu lur viadi terreste.

Nies defunct ha era mess a dispoziun sias forzas pil generaleesser. Alla vischnaunca da Tujetsch ha el surviu sco commember dil Cussegl da vischnaunca, dil Cussegl da scola, dalla Cumissiuun da planisaziun e sco gerau. Bia onns eis el staus alla testa dil Schurmetg civil da nossa vischnaunca e tgamunau quel cun gronda capientscha.

Tier la pleiv da Tujetsch ei il Flurin s'engaschus sco commember ella su-prastonza ed ei staus igl emprem president dil Cussegl pastoral. Bia uras da siu temps liber ha el plinavon unfriu si per la restauraziun dallas capluttas da Giuv e s. Brida. Quels dus objects sacral-culturalis eran propi carschi ad el el cor.

Sper tutta lavur da mistregn e quella pil generaleesser ha il Flurin era tgirau ses hobis. Sco giuven mat fageva el bugen cuorsa liunga. Per propi era el in passiunau catschadur e mava era bugen a pesca. El era ligiaus cun la natira e sia scaffiziun. Buca mo las bialas

trofeas da catscha regordan vid ils hobis dil trapassau mobein era bein enqual bategl entagliaus e dulaus ord lenn dattan perdetga da sia occupaziun d'unviern.

Ella vegliadetgna da 28 onns ha il Flurin menau agl altar da nozzas la giuvna Elisabeth Valier da Camischolas. Sia lètg ei stada benedida cun 6 buobas che han purtau bia legria en famiglia. Ils davos onns vegneva il triep da beadis adina pli e pli gronds per gronda legria dil defunct e sia consorta. El ei staus in bien bab da famiglia e giu grond quitau pils ses.

Il davos di d'avrel ha il Segner clamau siu survient tier el a casa. Ina disdida dil cor ha fatg fin cun sia veta terrestre - bia memia baul - cunzun per sia carezada famiglia. Ils 4 da matg eis el vegnius surdaus alla fossa. In grond conduct da bara ha accumpignau nies vischin sin siu davos viadi.

Flurin ruaussa en pasch.